

# Er suenter 100 onns activa

Tar la radunanza generala è vegnì festivà il giubileum da 100 onns da l'Uniun grischuna dals veterans da tir. Tradiziun, collegialità, cumpagnia e reconuschientscha: Quels pled èn stads en il center tar las gratulaziuns da pliras persunas.

GION NUTEGN STGIER/FMR

Cun il marsch grischun, sunà da la Musica instrumentala da la Polizia chantunala, è vegnida iniziada da *Max Buchli*, il president, la radunanza da giubileum da l'uniun, che reunescha ils veterans da tir. Da la partida a la festività da giubileum a Landquart èn stads persunas da la politica, dal militar ed er da numerusas autras organisaziuns. L'associaziun è populara e vegn stimada fitg da ses commembers, els ch'èn tranter 60 e passa 90 onns. Da preschent ha l'uniun bunamain 800 commembers. Fundada è quella vegnida il 1921 ed en sia istorgia da diesch decennis ha ella già 16 presidents. In da quels è er stà Placi Giusep Cadruvi ch'è mort avant in onn ed è stà dal 1994 fin il 2002 a la testa da l'Associaziun grischuna dals veterans da tir. Ils davos dus onns è il tir annual vegnì sajettà sin ils stands da tir da chasa e betg sco usità a Tusaun durant plirs dis. Quai è stà necessari pervia da las ordinaziuns da la pandemia.

## Respect envers l'uniun

L'anterier president dal Cussegl grond *Martin Wieland*, ha remplazzà *Aita Zanetti*, la presidenta actuala dal parlament grischun. El ha ditg ch'il sajettar na saja betg ina chausa guerrila, mabain il tir haja plitost in aspect social. Il sajettar saja bain er in pensum statal-politic e saja dentant er qua per la protecziun e la segirezza da la populaziun. Divisiunari *Lucas Caduff* ha ditg en ses pled che l'uniun meritia in



Quatter veterans da tir sursilvans e quatter tiradurs da vaglia. (da san.) Raimund Spescha, Ignaz Caduff, Roman Egger e Guido Sgier.

FOTO GION NUTEGN STGIER

grond respect. Surviva in'associaziun 100 onns, lura haja quella adempli ses basegn e correspundia a quel basegn er anc oz. Tiradurs procuran e chaschunan per segirezza ed er per stabilitad. La direcziun da l'armada svizra possia er quintar cun ils tiradurs e gist perquai ins dastga esser losch, ha ditg il divisiunari sursilvan.

## Avair quità dal sajettar

In dals gratulants è er stà *Martin Bühler*, il manader da l'Uffizi da militar e protecziun civila. El haja cumplettamain chapientscha per la situaziun plitost tendida pervia da Covid-19 er tar tiradurs e tiradurs. Tegnair ensemen, restar calm, avair disciplina ed avair maniera, quai saja era per anc in pli grond temp bain la dretga tenuta, ha punctuà Bühler. Il tir ed er l'uniun contribueschian fitg bler a

las valurs da cuminanza da nossa societad. Er en l'avegnir saja d'avair quità dal sajettar. *Bernhard Lampert*, fin avant curt anc president dals veterans tiradurs da l'entira svizra ha ditg che er suenter 100 onns existenza da l'uniun sajan e restian il senn e la finamira. Lampert ha ditg: «Tradiziun na saja betg la conservaziun da la tschendra, mabain la transmissiun dal feu». A pled è er vegnida *Katharina Hausmann*, la suprastanta da la vischnanca dad Igis-Landquart. Ella ha menziunà che grazia al tir viva la tradiziun bler dapli e vegnia er stimada dapli. Collegialità, cumpagnia e libertad tutgan tar il sajettar. Suenter las festivitads da giubileum ha lura già lieu la rangaziun dal tir da l'onn. En tut las categorias èn er stads sin il podest tiradurs da societads da tir da regiuns rumantschas.